



*Senin, 13 Januari 2025*  
**Ogen: Masmur 119:1015**



*Kata Dibata Tendang Man Nahengku*



**I**ja kita banci erlajar kerna kata Dibata? I bas Pustaka si Badia. I je tersurat kerina isi pusuh Dibata. Megati ituliskan kata Dibata e i bas renungen-renungen singkat. lit ka bimbingan kotbah, panduan PA, bimbingan PJJ ras sidebanna, tapi tetap perlu oge Pustaka si Badia.

Pustaka Si Badia e Kata Dibata, si erkuasa ras ergegeh i bas ngaturken kegeluhennta ras kerina isi doni enda. Kata Dibata e me kepentarenNa si isehkenNa man banta arah Pustaka Si Badia. KataNa e ringan i bas pusuh si mbagesna kal, ras erkuasa ngaturken geluhta. IbabaiNa kita ku bas perukuren ras perbahanen si bujur. IajariNa kita nggeluh mehuli, la erpandangan man sekelewetta.

i bas Pustaka si badia e isuratken aturen entah undang-undang si man ikutenken gelah kita la papak, la guling, ras la salah dalam. E maka nina pemasmur, KataNdu kap tendang man nahengku nerangi dalam si kudalani. Ibaratna i bas perdalanen si gelap, perlu lampu gelah teridah dalam. Adi enggo terang jelas alamat si man tujuan.

Melala si gelap i bas doni enda, labo dalam ngenca gelap, banci perukuren, banci perbahanen si gelap. Banci pengajuk kalak ku si gelap. Korupsi e perbahenen si gelap, erbual pe perbahanen si gelap, nangko, rubati, iri hati, dengki. E kerina perbahanen ras karakter si gelap. Adi pusuh e lalap iingani kata Dibata, la kita pediatNa bengket ku si gelap e, ibabaina, ituntunna, iteguna kita ngelewati si gelap, erdalan kita i bas terang. Sabap Dibata e kin terang e, janah kataNa me si mabai kita erdalan ras IA. Tetap oge Pustaka si mabai kita erdalan ras Dibata.

*☞ KataNdu kap terang man nahengku nerangi dalam si ku dalani*